



Broj: UP-I-KSI-09-18/23

Datum: 05.05.2023. godine

Na osnovu člana 25. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21), Komisija za odlučivanje o sukobu interesa, postupajući po službenoj dužnosti, u predmetu utvrđivanja povrede odredaba navedenog Zakona od strane Đ. K., [REDACTED] Brčko, člana Upravnog odbora Razvojno garantnog fonda Brčko distrikta BiH, kao nosioca javne funkcije, na 54 sjednici održanoj dana 05.05.2023. godine, donijela je sljedeće

RJEŠENJE

1. UTVRĐUJE SE da je Đ. K., iz Brčkog, [REDACTED], član Upravnog odbora Razvojno garantnog fonda Brčko distrikta Bosne i Hercegovine, kao nosilac javne funkcije postupio protivno članu 19. stav (1) i stav (2), te članu 20. Zakona o sprečavanju sukoba interesa u institucijama Brčko distrikta Bosne i Hercegovine, na način da dana 30.12.2021. godine u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja Aneks II Komisiji za odlučivanje o sukobu interesa nije prijavio nepokretnu imovinu člana porodičnog domaćinstva, oca.
2. UTVRĐUJE SE da je Đ. K., iz Brčkog, [REDACTED] član Upravnog odbora Razvojno garantnog fonda Brčko distrikta Bosne i Hercegovine kao nosilac javne funkcije postupio protivno članu 8. stav (1) Zakona o sprečavanju sukoba interesa u institucijama Brčko distrikta Bosne i Hercegovine na način da nije na drugo fizičko ili pravno lice prenio upravljačka prava na udjelu u kapitalu privatnog preduzeća „[REDACTED] [REDACTED]“, u kojem nosilac javne funkcije ima više od 0,5% udjela u kapitalu preduzeća.
3. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine, pod tačkom 1 i 2 ovog rješenja, Đ. K. se shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine izriče opomena.

Obrazloženje

Komisija za odlučivanje o sukobu interesa je po službenoj dužnosti zaključkom, broj: UP-I-KSI-09-18/23 od 09.03.2023. godine, pokrenula postupak za odlučivanje o povredi odredaba Zakona o sprečavanju sukoba interesa u institucijama Brčko distrikta Bosne i Hercegovine protiv nosioca javne funkcije Đ. K., člana Upravnog odbora Razvojno garantnog fonda Brčko distrikta Bosne i Hercegovine, jer je posumnjala u tačnost i potpunost podataka u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja. Aneks II, zbog neusklađenosti između prijavljene imovine u Izvještaju o imovinskom stanju, podnesenom dana 30.12.2021. godine Komisiji za odlučivanje o sukobu interesa i podataka prikupljenih od nadležnih organa i institucija o nekretninama nosioca javne funkcije kao i članova porodičnog domaćinstva, oca, jer nosilac javne funkcije nije prijavio, odnosno u Izvještaj o imovinskom stanju nije tačno i potpuno unio podatke o nepokretnoj imovini, tačnije nekretninu označenu kao parcela broj: [REDACTED] njiva, u površini od 1558 m², upisana u zemljišnoknjižni uložak broj: [REDACTED] vlasništvo C. K. sa dijelom od 1/1, član porodičnog domaćinstva nosioca javne funkcije, otac nosioca javne funkcije, čime je postupio protivno članu 19. stavovi (1) i (2) i članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Osim toga, uvidom u dostavljene podatke od strane Osnovnog suda Brčko distrikta Bosne i Hercegovine- Registar preduzeća i preduzetnika broj: 096-0-RegZ-22-003007 od 21.10.2022. godine, utvrđeno je da je Đ. K. jedan od osnivača preduzeća za proizvodnju, trgovinu i usluge „[REDACTED]“ dok je uvidom u dokumentaciju koju posjeduje Komisija evidentno da nosilac javne funkcije nije izvršio prenos upravljačkih prava na drugo pravno ili fizičko lice ugovorom za gore navedeno privatno preduzeće kako propisuje član 8. stav (1) Zakona o sprečavanju sukoba interesa u institucijama Brčko distrikta Bosne i Hercegovine.

Nosilac javne funkcije je istim zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja zaključka.

Nakon prijema zaključka o pokretanju postupka, broj: UP-I-KSI-09-18/23 od 09.03.2022. godine, Đ. K., član Upravnog odbora Razvojno garantnog fonda Brčko distrikta Bosne i Hercegovine, kao nosilac javne funkcije je dana 31.03.2023. godine dostavio Komisiji za odlučivanje o sukobu interesa pisano Izjašnjenje u kojem, između ostalog, navodi da nije postojala namjera da se nešto sakrije od Komisije za odlučivanje o sukobu interesa, odnosno da je do pogreške došlo zbog nepoznavanja odredaba Zakona o sprečavanju sukoba interesa u institucijama Brčko distrikta Bosne i Hercegovine jer je novoimenovani nosilac javne funkcije. Vezano za prenos upravljačkih prava, ističe da je navedeni propust uklonio, odnosno da je dana 31.03.2023. godine ugovorom izvršio prenos upravljačkih prava, a kao dokaz navedenom dostavio je Ugovor o prenosu upravljačkih prava u preduzeću iz kojeg je vidljivo da je Đ. K. dana 31.03.2023. godine izvršio prenos upravljačkih prava udjela od [REDACTED] na fizičko lice koje nije s njim povezano lice.

Đ. K. obavlja funkciju člana Upravnog odbora Razvojno garantnog fonda Brčko distrikta Bosne i Hercegovine na osnovu Odluka broj: 05-000382/20 od 16.10.2020. godine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisan je u Registar javnih funkcija i nosilaca javnih funkcija.

Članom 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije dužan u roku od 30 (trideset) dana od dana stupanja na javnu funkciju, podnijeti Komisiji Izvještaj, za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, dok je stavom (2) istog člana, između ostalog propisano i da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom b) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM, u Bosni i Hercegovini i inostranstvu.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da Đ. K. nije u Izvještaju o imovinskom stanju podnesenom 30.12.2021. godine Komisiji za odlučivanje o sukobu interesa, unio podatke o vlasništvu nad nekretninom označenom kao parcela broj: [REDACTED] njiva, u površini od 1558 m², upisana u zemljišnoknjižni uložak broj: [REDACTED], vlasništvo C. K., člana porodičnog domaćinstva, oca čime je postupio protivno članu 19. stavovi (1) i (2) te članu 20. Zakona o sprečavanju sukoba interesa u institucijama Brčko distrikta Bosne i Hercegovine.

U Izvještaj o imovinskom stanju-Aneks II, Đ. K. je u rubriku „Podaci o roditeljima“ upisao C. K., te postoji obaveza nosioca javne funkcije unijeti podatke o imovini člana porodičnog domaćinstva, oca u Izvještaj o imovinskom stanju.

Prenos upravljačkih prava je izvršen ugovorom od 31.03.2023. godine.

Na osnovu navedenog odlučeno je kao u tački 1. dispozitiva ovog Rješenja.

Nadalje, članom 8. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da nosilac javne funkcije koji ima 0,5% (nula zarez pet posto) i više dionica, odnosno udjela u kapitalu privatnog preduzeća za vrijeme obavljanja javne funkcije, ugovorom prenosi upravljačka prava na drugo pravno ili fizičko lice u roku od 30 (trideset) dana od dana stupanja na javnu funkciju, koji upravljačka prava vrši u svoje ime, a za račun nosioca javne funkcije.

Primjenom navedene zakonske odredbe na utvrđeno činjenično stanje, ocijenjeno je u konkretnom slučaju da postoji povreda odredbe člana 8. Zakona o sprečavanju sukoba interesa u institucijama Brčko distrikta Bosne i Hercegovine, na način da je propustio ugovorom izvršiti prenos upravljačkih prava, koja proizilaze iz vlasništva nad poslovnim udjelom u kapitalu privatnog preduzeća [REDACTED] na fizičko lice koje nije s njim povezano lice.

Na osnovu navedenog odlučeno je kao u tački 2. dispozitiva ovog Rješenja.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju u obzir uzela sve okolnosti kako bi izrečena sankcija odgovarala učinjenoj povredi Zakona. Komisija je vodila računa o težini i posljedici povrede Zakona, te činjenici da je Đ. K., nosilac javne funkcije, predao Izvještaj o imovinskom stanju za 2022. godinu u kojem je upisao podatke o predmetnoj nepokretnoj imovini člana porodičnog domaćinstva, oca, da se radi o prvoj povredi odredaba Zakona. Nadalje cijenila je njegovo postupanje i odgovornost, ličnost nosioca javne funkcije, odnos imenovanog prema kršenju odredaba Zakona, opredijeljenost imenovanog da postupi u skladu sa Zakonom, te otkloni razloge koji su doveli do kršenja odredaba Zakona. S tim u vezi Komisija je cijenila činjenicu da je nosilac javne funkcije izvršio prenos upravljačkih prava za [REDACTED] kao i da je o tome obavijestio Komisju za odlučivanje o sukobu interesa. Nadalje Komisija je cijenila i prouzrokovane posljedice nastale predmetnom povredom Zakona, kao i da se očito radi o lakšem obliku kršenja odredaba zakona koje nisu nanijele štetu integritetu javne funkcije koju Đ. K. obavlja, te je Komisija stava da izrečena opomena u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 43. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl. pravnik

Dostavljeno:

1. Đ. K., [REDACTED] Brčko distrikt BiH,
2. Internet stranici Komisije,
3. Evidenciji i
4. Arhivi.